

劉子集證補錄

王叔岷

拙著劉子集證十卷，（本所專刊之四十四。）重在陳言、故實之探討，訓詁、校勘之發正。近與諸生講習是書，時有新知，增益舊說，因撰補錄一卷。五十二年一月七日叔岷記。

防慾第二

故蝸盛則木折，慾熾則身亡。

案嵇康答難養生論：『故蝸盛則木朽，欲勝則身枯。』

去情第三

身膚強飯，而蒙飽者不以爲惠。

案史記絳侯周勃世家：『取庸苦之，不與錢。』（又見漢書及論衡骨相篇。）亦可證此文『身膚』爲『取庸』之誤。

韜光第四

周雞斷尾，獲免於犧牲。

案史通疑古篇：『譬雄雞自斷其尾，用或免於人犧者焉。』亦可證此文衍牲字。

崇學第五

岷竹未斷，則鳳音不彰。

案御覽五百八十、記纂淵海七八並引史記云：『黃帝使伶倫伐竹於昆谿，斬而作

笛，吹之作鳳鳴。』

非淬礪而不銛。

案淬借爲焯，說文：『焯，堅刀刃也。』漢書王褒傳：『清水焯其鋒，』（文選焯作淬。）師古注：『焯，謂燒而內水中以堅之也。』

蘇生患睡，親錐其股。

案御覽三七二引史記：『蘇秦握錐自厲，流血至踝。』

專 學 第 六

使左手畫方，右手畫圓，令一時俱成，雖執規矩之心，迴剟闕之手，而不能者，由心不兩用，則手不並運也。

案論衡書解篇：『方、員畫不俱成。』

譬若聳者之歌，效人爲之，无以自樂。

羅錄敦煌本效作教。案教猶效也。廣雅釋詁三：『教，效也。』（前疑教爲教之誤，未審。）

辯 樂 第 七

上能感動天地，下則移風易俗。

案能、則互文，則猶能也。（此義王引之經傳釋詞、吳昌瑩經詞衍釋並不載。）

左哀十一年傳：『鳥則擇木，木豈能擇鳥。』（史記孔子世家則作能。）亦能、則互用，與此同例。

履 信 第 八

齊桓不背曹劌之盟。

案事又詳史記齊世家。

吳起不虧移轅之賞。

案記纂淵海四九引史記：『吳起欲伐秦，恐士卒軍人不信，書：「有能移此轅置西門者，給田宅百畝，黃金百斤。」有一人來移，即賜之。於是召募人伐秦，遂

克。』

思 順 第 九

蹇利東南，

案明楊慎丹鉛續錄一引『東南』亦作『西南。』

貴 農 第 十 一

智者無以施其策，勇者無以行其威。

程榮本、王謨本、畿輔本上以字並作所，與下以字互用，所猶以也。（此義經傳釋詞、經詞衍釋並不載。）淮南子齊俗篇、文子上義篇兩以字並作所，（已詳集證。）亦明其義相同。

從 化 第 十 三

堯、舜之人，可比家而封。

案帝範崇儉篇注引史記：『堯、舜之民，比屋可封。』

法 術 第 十 四

故制法者，爲禮之所由，而非所以爲治也。

案史記貨殖列傳：『法令者，治之具，而非制治清濁之源也。』亦可證此文衍制字，禮爲治之誤。

審 名 第 十 六

傳彌廣，理逾乖；名彌假，實逾反。

案假借爲遐，廣、遐義近。

周人玉璞，其實死鼠。

案西京雜記六：『物固亦有似之而非者：玉之未理者爲璞，死鼠未屠者亦爲璞。』

鄙名第十七

名言之善，則悅於人心；名言之惡，則伎於人耳。

案兩之字並與若同義。慎言篇：『出言之善，則千里應之；出言之惡，則千里違之。』『之善、』『之惡，』兩之字亦並與若同義。

是以古人制邑名子，必依善名。

案史記褚少孫補日者列傳：『故曰：制宅命子，足以觀士。』

知人第十八

自非神機洞明，莫能分也。

案自猶苟也。心隱篇：『自非明哲，莫能辨也。』自亦猶苟也。

眉睫之微，而形於色；音聲之妙，而動於心。

案妙借爲眇，方言十三、釋名釋疾病並云：『眇，小也。』微、眇義近。

薦賢第十九

昔時人君，拔奇於囚虜，擢能於屠販。

案水經河水注五引司馬遷云：『呂望行年五十，賣食棘津；七十，則屠牛朝歌；行年九十，身爲帝師。』

內薦不避子，外薦不避讎。

案荀子成相篇：『外不避仇，內不阿親，賢者予。』

忠之至也，德之難也。

案難猶盛也，詩小雅隰桑：『隰桑有阿，其葉有難。』傳：『難然，盛貌。』卽其證。至、難義近。

託附第二十一

然，蚩風歛至，

案歛，正作歛。說文：『歛，有所吹起。讀若忽。』

蓋斯爲美也。

案論語學而篇：『先王之道，斯爲美。』

心隱第二十二

蛇床之似麋燕也。

案淮南說林篇：『蛇牀似麋燕。』

命相第二十五

華胥履大人之迹，而生伏羲。

案書鈔二三引河圖：『大跡出雷澤，華胥履之，生宓戲。』路史後記一引孝經鉤

命決：『華胥履迹，怪生皇羲。』

慶都與赤龍合，而生唐堯。

案論衡奇怪篇：『讖書又言：堯母慶都野出，赤龍感己，遂生堯。』

夫都見白氣貫月，而生殷湯。

案藝文類聚十引河圖：『湯母扶都見白氣貫月，意感而生湯。』

顏徵感黑帝，而生孔子。

案禮記檀弓孔疏引論語緯撰考：『叔梁紇與徵在禱尼丘山，感黑龍之精，以生仲尼。』

老子感火星。

案史記老子列傳正義引玄妙內篇：『玄妙玉女夢流星入口而有娠，七十二年而生老子。』又引上元經：『李母晝夜見五色珠，大如彈丸，自天下，因吞之，卽有娠。』

伏羲日角，

案路史後紀一引孝經援神契：『伏羲日角。』宋均注：『日角，額有骨表，取象日所出。』（御覽七八亦引此注，脫額字。）

孔子返宇，

案路史後紀十注：『緯書言：「孔子反宇。」世本云：「反首張面，言頂上竄也。』』

史記孔子世家索隱：『孔子頂如反宇。反宇者，蓋屋宇之反，中低而四傍高也。』
梁釋僧祐弘明集—漢牟融理惑論作『仲尼反顛。』說文：『顛，頭妍也。』徐鍇繫傳：『書傳多言「孔子反宇，」作此顛字，云：頭頂四崖峻起，象尼丘山。』
論衡骨相篇作『孔子反羽。』（已詳集證。）羽蓋顛之省。

泉陶鳥喙。

案程榮本、王謨本、畿輔本陶並作繇。陶、繇古通，尚書泉陶謨，北堂書鈔四三、治要引陶並作繇，即其比。牟融理惑論鳥作馬，與淮南子脩務篇、論衡骨相篇、講瑞篇並同。

後來而產，是子不祥。

案路史後紀十四後作后，祥作勝。

妄瑕第二十六

故天有拆之象，地有裂之形。

案淮南天文篇：『天傾西北，故日月星辰移焉。地不滿東南，故水潦塵埃歸焉。』
（又見列子湯問篇。）

適才第二十七

卞莊子之昇殷庭也，鳴佩趨蹌，溫色怡聲；及其搏虎，必攘袂鼓肘，瞋目震呼。

案史記張儀列傳載卞莊子刺虎事，戰國策秦策二作管莊子，同。

雖使孫、吳用兵，彼必與之拒戰，未肯有望風而退也。

案有猶即也，（王引之經傳釋詞、吳昌瑩經詞衍釋並無此義。）『未肯有望風而退也，』猶『未肯即望風而退也。』戰國策趙策三：『彼則肆然而為帝，過而遂正於天下，則連有赴東海而死矣。』（又見史記魯仲連列傳。）有亦猶即也，『則連有赴東海而死矣。』猶『則連即赴東海而死矣。』

慎言第三十

故天有卷舌之星。

案漢書劉向傳：『客星見昴、卷舌間。』沈欽韓疏證：『晉天文志：「卷舌六星在昴北，主口語以知讒佞也。」』

斯言一玷，非礪礪所磨；樞機既發，豈駭電所追。

案兩所字，義並與可同。

慎隙第三十三

鴻蟲性輕，積之沉舟；縉縞質薄，疊之折軸。

案史記張儀列傳：『積羽沈舟，羣輕折軸。』（本韓策。）

禍之至也，人自生之；福之來也，人自成之。禍與福同門，害與利同鄰，若非至精，莫能分矣。

案史記褚少孫補龜策列傳：『故曰：福之至也，人自生之；禍之至也，人自成之。禍與福同，刑與德雙，聖人察之，以知吉凶。』

大質第三十六

昔子閻之劫也，擬之白刃，而其心不傾；晏嬰之盟也，鉤以曲戟，而其志不廻。

案白公以刃劫子閻事，又詳說苑義勇篇。『擬之白刃，』『鉤以曲戟，』之、以互文，之猶以也。論語陽貨篇：『君子義以為上，』史記仲尼弟子列傳以作之；淮南子汜論篇：『水激波興，高下相臨，差以尋常，猶之為平。』高誘解『猶之為平，』為『猶以為平。』並之、以同義之證。史記太史公自序：『故易曰：失之豪釐，差以千里。』（又見漢書東方朔傳。大戴禮保傅篇引易、文選任彥昇齊竟陵文宣王行狀注引易乾鑿度以並作之。）之、以互用，與此同例。

兵術第四十

故水因地而制，

案孫子虛實篇制下有流字，文選王仲寶褚淵碑文注引孫子作『水因地而制行。』

（曹子建求自試表注引同，惟誤孫子為孫卿。）行與流義近。

故醇醪注流，軍下通醉。

案藝文類聚七二引黃石公記：『昔者良將用兵，人有饋一單醪者，使投之於河，令將士迎流而飲之。夫單醪不能味一河水，三軍思爲之死，非滋味及之也？』御覽二百八十引史記：『楚人有饋一簞醪者，楚莊王投之於河，令將士迎流而飲之。三軍皆醉。』

閱武第四十一

司馬法曰：『國家雖大，好戰則亡；天下雖安，忘戰必危。』

案史記主父偃列傳：『司馬法曰：「國雖大，好戰必亡；天下雖平，忘戰必危。」』

貴速第四十三

驥所以見珍者，以其日行千里也。滿旬而取至，則與駑馬均矣。

案淮南子齊俗篇：『夫騏驥千里一日而通。駑馬十駕，旬亦及之。』

類感第五十

故抱薪救火，燥者先燃；平地注水，濕者先濡。

案荀子大略篇：『均薪施火，火就燥；平地注水，水流溼。』

正賞第五十一

古今雖殊，其迹寔同；耳目誠異，其識則齊。

案雖、誠互文，誠猶雖也。（此義經傳釋詞、經詞衍釋並不載。）言苑篇：『故春藥雖茂，假朝露而抽翠；秋葉誠危，因微風而飄零。』雖、誠互用，與此同例。

鬼魅質虛，而犬馬質露也。

案『質露』疑本作『形露，』涉上『質虛』而誤也。下文『形露者，不可誣罔以是非。』卽承此『形露』而言。

齊景公高仰管仲之謀，而不知晏嬰之智。

案程榮本、王謨本、畿輔本並無而字，與上下文一律。

以燕石爲美玉者，唯猗頓不認其眞。

案尸子治天下篇：『凡治之道，莫如因智；智之道，莫如因賢。譬之猶……
……相玉而借猗頓也。金樓子立言篇上：『碧虛似玉，猗頓別之。』

不沒纖芥之善，

案論衡感類篇：『孔子作春秋，采毫毛之善，貶纖介之惡。』（芥、介古通。）又見案書篇、對作篇。

激通第五十二

矢驚則能踰白雪之嶺。

案水經睢水注：『闕子稱：『宋景公使弓人爲弓，九年乃成。公曰：何其遲也？對曰：臣不復見君矣！臣之精盡于弓矣！獻弓而歸，三日而死。景公登虎園之臺，援弓東面而射之，矢踰于孟霜之山，集于彭城之東，餘勢逸勁，猶飲羽於石梁。』又見水經泗水注、文選左太沖吳都賦劉淵林注（文並較略），鮑明遠擬古詩李善注（闕子誤闕子，『孟霜之山』作『西霜之山』）、北堂書鈔一二五、藝文類聚六十、宋吳曾能改齋漫錄五。袁註：『矢踰於山，過於彭城之東，勁過石梁，箭又沒其羽。』云云，（詳集證。）蓋本於闕子。惟闕子以爲宋景公事，與袁註作秦穆公亦不符。

主父無親友之蔑，必不窺五鼎之食。

案事又見史記主父列傳。

言苑第五十四

事可以必誠，

案誠借爲成。

情發於中，而形于聲。

案史記樂書：『情動於中，故形於聲。』

是以火焚而怨隧人，

案『是以』猶『是猶』，以與猶同義，（此義經傳釋詞、經詞衍釋並不載。）下文『是以臨渴而穿井』，『是以』亦猶『是猶』。論語泰伯篇：『三分天下有其

二，以服事殷。』史通疑古篇以作猶，亦二字通用之例。

九流第五十五

重樂、有命。

案有借爲右，淮南子汜論篇：『右鬼、非命。』高誘注：『右猶尊也。』『有命』猶『尊命』耳。尊、重義近。

則氛亂競起。

案氛與紛同。

附 記

明馮惟訥古詩紀前紀卷之十載劉子引古諺云：『深不絕涓泉，稚子浴其淵；高不絕丘陵，跛羊遊其巔。』並於『劉子引古諺』下注云：『劉晝，字孔昭。』此爲劉子佚文，已詳集證附錄一。田宗堯學弟檢示明周嬰卮林卷七詮鍾『劉子』一則：

〔明鍾惺〕詩歸載劉子引古諺曰：『深不絕涓泉，稚子浴其淵；高不絕邱陵，跛羊遊其顛。』詮曰：『劉子，其劉勰乎？勰書無此語。惟牟子理惑論曰：「若高不絕山阜，跛羊陵其顛；深不絕涓流，孺子浴其淵。」總非引諺也。』

案周嬰疑劉子爲劉勰，與馮惟訥說異。惟馮氏以爲劉晝，亦不知何本。周氏引牟子（漢牟融）理惑論，見梁釋僧祐弘明集一。